

# ITER IVLII II PON-

TIFICIS RO. PER HADRIANVM CARDI

NALEM SANCTI CHRYSOGONI.



Vgusti memoranda dies uigesimasexta  
 Pontificem magna Roma dimisit Iulum,  
 Penè omni Patrū, & procerū comitante senatu.  
 Formello pius excepit Iordanus, & uxor  
 Moribus, ingenio, formáq;, & nomine Felix.  
 Postera lux Nepete antiquum, tum proxima Veios  
 Ostendit: mox per Cimini montemq;, lacumq;  
 Tendimus insignem per balnea multa Viterbum.  
 Discordes bonus hic ciues pacauit Iulus.  
 Præbuit hinc celebrer mons dulcia uina Faliscus,  
 Detinuitq; diem. Veterem post uidimus urbem  
 Excelsæ rupi impositam sine mœnibus ullis.  
 Hic templum genitrici ingens, cui sculpta uetusto  
 Marmore stat facies, spirantq; in marmore uultus.  
 Carnaiola procul pons hinc sex millia distans  
 Cyaneas transmittit aquas, sparsasq; paludes  
 Per sata, per syluas: ah quantum absumitur agri.  
 Plebis ad indomitæ castrum peruenimus, inde  
 Impositæ apparent Perusinis collibus arces.  
 Castellona lacus Trasimenus mœnia cingit,  
 Hunc ratibus læti tranauimus, Insula lætos  
 Accipit hospitio, Pasianum allabimur, unde

Prospicimus

Prospicimus campos Romanis ossibus albos.  
 Seruat adhuc nomen locus:& de sanguine fuso  
 Sanguineos campos Perusini nomine dicunt.  
 Hic ubi commisso fallax certamine Pœnus  
 Flaminiúmque ducem, Mauortiáque arma subegit:  
 Per colles, ripamque lacus Cordana subimus  
 Mœnia, oliuiferis tumulis lætissima rura:  
 Vicina placuit Patribus recubare sub Vlmo.  
 Hic simul occurrunt equitum, peditumque cateruæ  
 Urbinate Duce: illo nec melior fuit alter  
 Nec pietate prior, sed nec præstantior armis:  
 Tot dotes iuueni inuidit lapidosa podagra.  
 His circūsepti legionibus, ordine longo  
 Ingredimur Perusinam urbem, ciuilibus actam  
 Euersamque odijs, hanc tu pater optime Iuli  
 In placida tandem compositam pace relinquis.  
 Non procul oppidulam est, Fractam cognomine dicunt:  
 Amnis obit muros cœno, & graue olentibus undis.  
 Huc ubi delati, montes Eugubia tecta,  
 Hærentemque iugis urbem superauimus, inde  
 Perpetuos colles Catiani uillula findit:  
 Villula munifico non aspernanda popello.  
 Hos præteruectis tumulos plebecula callem  
 Quæ colit angustum, Cagli cognomine dicunt:  
 Occurrit facie obducta, nam tabida fertur  
 Infecisse lues, celeri pede fugimus omnes.  
 Hinc ad aquas Lantias perreximus, unde Methaurus

Confusus Gauno Foruli spectacula præbet,  
 Est operæ precium uersu describere mirum  
 Naturæ ludentis opus:stant uertice ad auras  
 Hinc atq; hinc montes prærupti, flumine subter  
 Secretis labente uis, ut fumus ab imis  
 Surgat aquis, lateq; fluant aspergine cautes.  
 Rupis ad extremum leua uenientis ab urbe  
 Porrigitur molis dorsum, qua semita nulla  
 Nulli aditus quondam, nec erat uia peruia cuiq;  
 Cæsar inaccessam patefecit Titus: & illam  
 Quantum acie possunt oculi seruare cauauit,  
 Inscrisitq; fores: & adhuc uestigia utrūq;  
 Limen habet, scabro & fragili uix cognita topho.  
 Sunt soliti hac camera multi latitare latrones,  
 Exceptosq; uiatores demergere in amnem.  
 Reptus est crypta, atq; angusta fauce uiritim  
 In campos Vbalde tuos, hinc imus in urbem.  
 Urbinum dixere patres tua regia tecta,  
 Ardua quæ saxo colitur Macerata uetusto  
 Hinc petitur, uicōq; breui succedimus, inde  
 Scandimus excelsas nymbose cacumina pennas  
 Diue Marine tuas, tumidi hic subsidere montes  
 Incipiunt, superōq; mari consternere littus  
 Planiciem ingentem terris, opibusq; superbam,  
 Gallia qua fluuio Rubicone comata patescit.  
 Italia hic finis quondam, nunc omnia miscet  
 Effera Barbaries, antiquaq; nomina uertit.

Sauignana

Sauignana uocant pinguiſſima rura coloni.  
 Huc madidi multoq; luto, feſſiq; uenimus.  
 Progreſſi meliore uia, caelo grauiore  
 Caeſenam intramus, culices auertere ſomnos  
 Omnibus, & uarijs uultus maculare figuris,  
 Pompili, Liuiq; forum diuertere cogunt:  
 Terra ferax, populusq; ferox, ac caede frequenti  
 Terribilis, ſemperq; furens ciuilibus armis.  
 Ut terquinq; dies abierunt, Liuia teſta  
 Linquimus, atq; iterum montes iubet ire per altos  
 Iulius, & Caſtri ad leuam iuga uiſere Cari.  
 Imus praecipites per mille pericula rerum  
 Turrigerasq; arces, rupes, & inhospita ſaxa.  
 Appennicolae accurrunt, uiſoq; ſenatu  
 Reptantes genibus per humum noua numina adorant.  
 Mudiana iacet ualſto depreſſa barathro  
 Accola torrenti, truncis, ſalebriſq; fragoſo:  
 Hanc terram pedibus celſo de monte ruentes  
 Praendimus, & placido curamus corpora ſomno.  
 Poſtera lux alios ſcopulos, caeloq; propinquas  
 Nubigenasq; alpes aperit, Marradia uulguſ  
 Saxa uocat, ſummum excipiunt magalia Iulum.  
 Inde Palatiolum ſtatio opportuna labori  
 Hoſpicio laſſos refouet, tum fluminis arcta  
 Prouehimur ripa tenui diſcrimine euntes.  
 Eſt locus extremis in montibus aſper Heruſcis,  
 Hunc dictum perhibent a tuſſi Tuſſinianum:

Huc quoq; delati montes deuouimus omnes.  
 Orta dies latos campos, & amœna uireta,  
 Corneliq; forum, feliciq; arua reducit.  
 Hic meus ortus habet sedes Papiensis auitas  
 Nobilis, & clarum genus alto à sanguine ducit.  
 Constitit hic pastor, dum prospicit omnia Iulus:  
 Et belli, paciſq; simul dum pondera librat,  
 Conſilioq; patrum rerum moderatur habenas.  
 Appulit interea Gallorum exercitus ingens,  
 Conſeruitq; manum: & muros circūſtetit armis  
 Felſina docta tuos: uolat impiger actus ab urbe  
 Nuncius: & Serram exactam, pulſumq; Tyrannum,  
 Excuffumq; iugum patriæ ceruicibus affert:  
 Pontificem implorat feſſis ſuccurrere rebus.  
 Hoc oratores certatim ex urbe frequentes  
 Expoſcūt, patriæq; patrem properare precantur.  
 Thura adolet Iulus templis, ſacriſq; peractis  
 Tendit iter, greſſum celerans, urbiq; propinquat.  
 Vrbs antiqua ingens Hetruſcis regia quondam  
 Felſina: tum Bois fato irrupentibus impar  
 Accepiſſe nouum fertur Boionia nomen:  
 Verum ubi ſunt Boi Romano milite pulſi,  
 Barbariem excuffit, cœpitq; Bononia dici:  
 Subditur ad Boream radicibus Appennini:  
 Planicie accliu, procumbens ſolis ad ortus:  
 Inter aquas Sapinæ, & Rheni, quarum utraq; in urbem  
 Ducta uehit, reuehitq; rates, piſtrinâq; uerſat:

Aemilia

Aemiliae decus, & belli, pacisque patrona:  
 Diues opum uariarium, & nullius indiga cultus:  
 Musarum domus, atque omnis nutricula iuris,  
 Iamque dies aderat, mediumque uehebat ad axem  
 Omnia conspiciens Phœbeae lampadis astrum:  
 Obsedere patres maioris limina portæ,  
 Qua modo Felsinea pastor requieuerat æde:  
 Porticibusque amplis expectant numen Iuli.  
 Tandem de thalamo fella sublimis eburna,  
 Gestatusque hominum scapulis, longo agmine prodit:  
 Cui trabea ex auro, gemmis, ostrisque coruscat:  
 Tempora conchili fulgent redimita tiara:  
 Progreditur procerum legio tua Felsina proles:  
 Aeratæque ruunt acies, dypeatæque circum  
 Agmina funduntur, placidos dat Curia gressus  
 Aequati spatij omnes, & uestibus omnes:  
 Purpureisque patres tecti capita alta galeris:  
 Obuia queque oculis præstringunt numinis instar:  
 Visendi studio effusi iuuenesque, senesque,  
 Et matres puerique simul tecta omnia complent:  
 Culminibusque astant, portisque, & turribus hærent.  
 Ut uero ad diui uenit penetralia Petri  
 Iulius, aspersitque patres in limine primo  
 Rore leui: geminis manibus ueneratus ad aras  
 Effigies sacras, Grates quas possumus inquit  
 Accipe CHRISTE deus: nam quæ sat digna queamus  
 Munera? quas laudes humana uoce referre?

Gg , Tu

Tu nos incolumes per tot discrimina uectos  
 Vrbe hac Felsinea sine cæde, & sanguine donas.  
 Da pater omnipotens, rerumq; æterna potestas  
 Sic superos penetrare aditus, ueroq; triumphos,  
 Terreno inuolucro exutos, uitijsq; subactis.  
 Hæc ubi supplicibus uotis orauit Iulus,  
 Quisq; domum properat, factoque hic sine quiescit.

R

I

N

I

B.

B A S I L E A E, A P V D I O

A N N E M F R O B E

N I V M, M E N S E

I V N I O,

A N N O

M. D. XVIII.

Εἴνεοθε φρόνιμοι ὡς οἱ ὄφας,

Prudens simplicitas amoris recti.



Ἐὐφροσύνη ἁπλοῦς ἀγάπης ῥητῆς ῥητῆρος

ἄκέραιοι ὡς αἱ περιστραί.

IN INCLYTA GERMANIAE BASILEA.

M. D. XVIII.